

A Ribeira Sacra protagonista da última tirada de Weinwirtschaft

Os viños galegos son protagonistas da última tirada desta publicación alemá, a través dunha iniciativa do IGAPE de Düsseldorf. Os artigos están elaborados polo xornalista alemán Jürgen Mathab, tras a súa visita a Galicia en xuño deste ano. A revista, que servirá para presentar os viños galegos en Alemaña e como prólogo á feira Prowein 2011, leva como portada, e polo tanto como carta de presentación do viño en Galicia, unha imaxe emblemática da D.O. Ribeira Sacra.

Segundo recolle o xornalista alemán, a paisaxe de viñedo da D.O. Ribeira Sacra é un dos terreos cultivados máis máxicos da Terra. Fala das escarpadas e perigosas ladeiras, de como os primeiros socalcos se remontan á época romana e de como, cos séculos, chegaron as ermidas, os mosteiros,...

Na publicación repásanse datos técnicos da Denominación: superficie, producción, adegas,... Sorpréndelle a Jürgen Mathab a cantidade de adegas que teñen pouca producción e como estas infraestruturas aparecen diseminadas e ocultas nas aldeas ou entre castiñeiro. Repásanse as variedades de uva e as distintas contraetiquetas que os viños da D.O. sacan ao mercado.

O xornalista alemán anima aos adegueiros de Ribeira Sacra a experimentar coas elaboracións e recolle literalmente: “Un terroir de gran valor e a beleza da paisaxe son, con seguridade, os puntos fortes da rexión. O microclima e o chan ofrecen moitas posibilidades.”

Durante a súa visita a Ribeira Sacra deixábanos estas impresións, similares ao que agora aparece na publicación que se distribúe en Alemaña: “Incredible, spectacular, só un par de lugares más no mundo se poderían comparar coa viticultura de Ribeira Sacra. Esa paisaxe transmítese ao viño”.